

Plan pa bira Centro Regional

Fepo a celebra 40 aña di existencia

ORANJESTAD – 40 aña pasa, riba 29 di april 1974, sr. Van Leerdam, sr. Arénds y sr. Mansur a lanta Fundacion pa Esnan cu Problema di Oido (Fepo). Y awor e fundacion kier desaroya pa bira un centro regional tambe di Audiologia.

E aniversario e aña aki a wordo celebra cu un cena pa miembronan di directiva y personal di e fundacion hunto cu algun invitado special, Fepo ta informa. “Den e ultimo cuarenta añanan a haya renombre den nos comunidad como e sitio di referencia pa ciudadano sordo of cu limitacion di oido, kende despues di sondeo di oido, por ser suministra, dependi-

endo e resultado di chekeo, cu un aparato di oido.”

Centro Regional

Fepo recientemente a firma un acuerdo di cooperacion como miembro special di Fenac, e Federacion di Centronan di Audiologia na Hulanda. Awor tin un ekipo di especialista envolvi den investigacion, revalidacion y guia di tanto mucha como adulto cu problema di oido. Cu e reconocimiento aki Fepo, pa medio di intercambio di expertise y training ta conta cu sosten di Fenac den su desaroyo pa bira e Centro Regional di Audiologia.

Cooperacion local

Fepa ta bisa cu e tin cooperacion estrecho tambe cu Wit

Gele Kruis, na unda ta haci sondeo di oido bao muchanan recién naci y cu Salubridad Hubenil cu ta examina e hubentud escolar. “Consulta regular entre Fepo y e instancianan aki ta percursa pa pasonan eficiente den cuido di oido tuma luga asina cu un mucha, infantil of mas grandi, no ta tende bon.”

Banda di un acupedista, pa testnan di oido, Fepo ta dispone tambe di un logopedista pa entrenamiento den habla y expresion idiomático, un trahado social pa asistencia social comunitario, un asistent administrativo y un manager. Nan conhuntamente ta percursa pa bon chekeo, revalidacion y guia na nos hendenan cu problema di oido, segun e



fundacion.

Implanta Coclear

Ya desde algun aña Fepo hunto cu Dr. Cabenda, a cuminsa cu implanta coclear. “Nos tin un tarea importante di coordinacion como tambe revalidacion di clientenan cu IC, tanto mucha como adulto. Esaki a cuminsa como un

proyecto pa solamente algun mucha, pero ya awendia ta un parti di pakete di cuido cubri pa AZV.” Ultimamente e fundacion ta bisa, e tin participacion principal den e consultanan andando cu islanan bisiña pa nan pashentnan por bin Aruba pa implanta coclear en bes di tin di bay te Hulanda. □